



Na osnovu člana 24. Zakona o dopunskim pravima boraca-branitelja Bosne i Hercegovine ("Službene novine Kantona Sarajevo", broj 45/12 - Prečišćeni tekst) i Uredbe o finansiranju programa za otvaranje radnih mjesta za branioce, ratne vojne invalide, porodice šehida i porodice poginulih, umrlih i nestalih branilaca ("Službene novine Kantona Sarajevo", br. 31/06, 20/09, 20/11 i 16/14), Ministarstvo za boračka pitanja Kantona Sarajevo **raspisuje**

JAVNI OGLAS

za podnošenje zahtjeva za dodjelu pozajmica za finansiranje programa za otvaranje radnih mjesta za branioce, ratne vojne invalide, porodice šehida i porodice poginulih, umrlih i nestalih branilaca u 2014. godini

1. Predmet javnog oglasa:

Podnošenje zahtjeva za dodjelu pozajmica za finansiranje programa za zapošljavanje demobilisanih boraca, vojnih invalida i članova porodica šehida i poginulih boraca sa područja Kantona Sarajevo.

2. Pravo učešća:

Pravo podnošenja zahtjeva za dodjelu pozajmica za finansiranje programa za zapošljavanje demobilisanih boraca, vojnih invalida, članova njihovog porodičnog domaćinstva i članova porodica šehida i poginulih boraca imaju pravna i fizička lica sa područja Kantona Sarajevo, koja imaju registrovano preduzeće ili samostalnu radnju za obavljanje ili pokretanje proizvodno-uslužnih djelatnosti, uz uslov da zaposle jedno ili više lica - pripadnika boračke populacije.

3. Uslovi za dodjelu pozajmica:

- Pravo na pozajmicu mogu ostvariti sva pravna i fizička lica koja otvaraju nova radna mjesta i planiraju zapošljavanje pripadnika boračke populacije, odnosno lica iz člana 1. Zakona o dopunskim pravima boraca-branitelja Bosne i Hercegovine.
- Pozajmice se odobravaju u visini do 20.000 KM po novouposlenom radniku, a najveći iznos po navedenom osnovu za pojedinačni program može se odobriti do 200.000 KM.
- Pozajmice se odobravaju na period od 96 mjeseci (8 godina), u okviru čega je grejs period od 12 mjeseci, sa kamatom od 3% na godišnjem nivou. Od ukupnog iznosa odobrenih sredstava najmanje 50% sredstava plasira se u stalna sredstva, a najviše 50% u tekuća-obrtna sredstva.
- Obezbjedenje urednog vraćanja pozajmice su slijedeći instrumenti:
 - a) za pozajmice do 20.000 KM, institut sudužništva prema bankarskim pravilima i platežnoj sposobnosti istih, i mjenice,
 - b) za pozajmice preko 20.000 KM, založno pravo na nepokretne stvari (hipoteka) zasnovano putem Suda u omjeru 1:2, i mjenice.

4. Podnošenje zahtjeva za dodjelu pozajmice:

Zahtjevi za dodjelu pozajmice podnose se Ministarstvu za boračka pitanja Kantona Sarajevo, ul. Reisa Džemaludina Čauševića br.1, 71000 Sarajevo.

Uz zahtjev je neophodno priložiti svu potrebnu dokumentaciju.

5. Potrebna dokumentacija:

- Zahtjev za pozajmicu, koji treba da sadrži: puni naziv tražioca pozajmice sa adresom i kontakt telefonom, iznos i namjenu pozajmice, podatke o lokaciji predviđenoj za obavljanje djelatnosti za koju se traži pozajmica, podatke o broju novoupisanih radnika i dosadašnje rezultate poslovanja ako tražilac pozajmice već obavlja djelatnost;
- Rješenje o registraciji, odnosno kopija sudskog Rješenja ili Rješenja nadležnog općinskog organa o obavljanju određene djelatnosti, a ako se radi o pravnom licu onda i kopija obavještenja Zavoda za statistiku o razvrstavanju poslovnih i drugih subjekata po djelatnostima i o jedinstvenom matičnom broju;
- Kraći biznis plan, koji mora sadržavati: uvodne informacije-osnovne podatke o tražiocu i opis djelatnosti, predračunsku vrijednost i strukturu ulaganja, rezultate dosadašnjeg poslovanja, tržište nabave repromaterijala i tržište prodaje proizvoda i usluga, ekonomsko-finansijsku analizu i izjavu o uspješnosti projekta na bazi procjene za period od osam godina, kao i strukturu potrebnih radnika (stručna sprema i zanimanje);
- Bilans stanja i bilans uspjeha, odnosno zadnju prijavu Poreznoj upravi (ako već posluje);
- Uvjerenje Poreske uprave da nema dospjelih a ne izmirenih obaveza;
- Izjava o ponuđenim instrumentima urednog vraćanja pozajmice, u kojoj se treba naglasiti da li je obezbjeđenje urednog vraćanja pozajmice hipoteka ili institut sudužništva (ranije: žiranti), ovjerena u općinskoj službi za ovjeru potpisa;
- Izjava o davanju saglasnosti za korištenje ličnih podataka (ovjerena od strane općinske službe za ovjeru potpisa);
- Druga dokazna dokumentacija po traženju Ministarstva za boračka pitanja ili poslovne banke (kao npr.: dokaz o posjedovanju poslovnog prostora, dokaz o posjedovanju nekretnine predložene za hipoteku – ZK uložak bez tereta, procjena nekretnine urađena od strane ovlaštenog sudskog vještaka odgovarajuće struke, izjave sudužnika i dr.).

6. Procedura odobravanja pozajmice:

- Po prijemu zahtjeva Komisija Ministarstva za boračka pitanja Kantona Sarajevo za rješavanje zahtjeva za dodjelu pozajmice za finansiranje programa će vršiti provjeru ispravnosti dokumentacije i ispunjenja osnovnih uslova za odobravanje pozajmice po zahtjevima, a nakon toga opravdane zahtjeve sa kompletnom dokumentacijom dostavljati na dalju obradu poslovnoj banci, sa kojom za ove namjene u 2014.godini bude zaključen ugovor o komisionom poslu.
- Stručna služba poslovne banke obrađivat će zahtjeve i svoje stručno mišljenje sa prijedlogom za odluku dostavit će Ministarstvu za boračka pitanja Kantona Sarajevo, koje nakon razmatranja i po prijedlogu Komisije za rješavanje zahtjeva za dodjelu pozajmice za finansiranje programa donosi konačnu odluku po svakom zahtjevu.
- Po odobravanju pozajmice poslovna banka zaključuje ugovor o pozajmici sa korisnikom pozajmice, a sredstva za pozajmicu će biti realizovana i plasirana korisniku u skladu sa odlukom i zaključenim ugovorom o realizaciji pozajmice, nakon što ista budu doznačena od strane Ministarstva za boračka pitanja Kantona Sarajevo na račun poslovne banke.
- Podnosioci zahtjeva kojima se odobri pozajmica (korisnici pozajmice) će biti dužni da u toku trajanja grejs (grace) perioda Ministarstvu za boračka pitanja Kantona Sarajevo dostave urednu dokumentaciju o zapošljavanju predviđenog broja radnika, koji moraju biti lica iz člana 1. Zakona o dopunskim pravima boraca-branitelja Bosne i Hercegovine ili članovi porodičnog domaćinstva ovih lica.

7. Sredstva za dodjelu pozajmice:

Finansiranje programa zapošljavanja za otvaranje novih radnih mjesta planirano je u Budžetu Kantona Sarajevo za 2014.godinu, iz primitaka predviđenih za ove namjene, u ukupnom iznosu od 500.000 KM. Ova sredstva mogu biti umanjena u zavisnosti od ostvarenja primitaka u Budžetu Kantona za 2014.godinu.

8. Rok za podnošenje i odobravanje zahtjeva za pozajmice:

- Rok za podnošenje zahtjeva za dodjelu pozajmica trajat će od 24.04.2014.godine do 24.06.2014.godine.
- Zahtjevi će se rješavati prema redosljedu prijema, a odobravat će se i realizovati u skladu sa dinamikom obrade istih od strane poslovne banke i dinamikom obezbjeđivanja sredstava planiranih za ove namjene.

9. Obavještenja i napomene podnosiocima zahtjeva:

- Podnosioci ranijih zahtjeva, čiji zahtjevi do 31.12.2013.godine nisu bili rješavani zbog nedostatka sredstava ili nepotpune dokumentacije, su dužni podnijeti nove zahtjeve sa kompletnom pratećom dokumentacijom kako bi bili rješavani u 2014.godini.
- Nepotpuni zahtjevi se neće uzimati u razmatranje i kao takvi će biti odbijeni.
- Dokumentacija podnesena uz zahtjev se neće vraćati podnosiocu, te se sugeriše podnošenje ovjerenih fotokopija potrebnih dokumenata.
- Uputstvo o načinu dobijanja i korištenja pozajmica za finansiranje programa za otvaranje radnih mjesta za branioce, ratne vojne invalide, porodice šehida i porodice poginulih, umrlih i nestalih branilaca se može dobiti u pisarnici Kantona Sarajevo (na info punktu) ili u prostorijama Ministarstva za boračka pitanja Kantona Sarajevo i na internet stranici Ministarstva za boračka pitanja: mbp.ks.gov.ba.
- Za sve nejasnoće i konsultacije zainteresovani se mogu obratiti i putem telefona na broj +387 (0) 33/562-012.

Broj: 06-14-9311/14
Sarajevo, 23.04.2014.god.



web: <http://mbp.ks.gov.ba>
e-mail: minbopi@ks.gov.ba
Tel: + 387 (0) 33 562-012, Fax: + 387 (0) 33 562-251
Sarajevo, Reisa Džemaludina Čauševića 1

